


皇朝實錄

冊八十



大清世祖體天隆運英睿欽文大德弘功至仁純孝章皇  
帝實錄卷之三十

順治四年春正月癸卯朔

上詣

堂子行禮還入宮拜神畢朝謁

中宮太后御太和殿諸王貝勒貝子公文武羣臣及外藩  
蒙古諸王上表行慶賀禮賜宴 朝鮮國王李倬遣陪  
臣尤贊成等表賀冬至元旦

萬壽聖節附貢方物及歲貢宴賚如例

乙巳

日半暈生左右珥赤黃色良久乃散 河南總兵官孔希貴奏報范縣土寇平報聞

丙午

河南巡撫吳景道以芝草產于嵩山表賀得

旨政教修明時和歲稔方為祥瑞芝草何必稱奇 鳳陽巡撫陳之龍奏報官兵救援如皋搗焚季七趙雲等賊巢斬級千六百有奇下兵部敘恤

丁未

諭文武各官今後凡隨征出差不得受地方官員餽遺

山西道監察御史佟鳳彩言近畿沿河州縣屢年衝

決有虧正賦宜令各州縣額設堤夫量其河之深淺口之寬狹修築凝固庶河水不至汎漲而秋成有望矣部覆允行

戊申

命輔國公鞏阿岱內大臣吳拜何洛會等率官兵征宣府地方

己酉

禁止鹽丁投充王貝勒等已經投充者亦令革除

庚戌

孟春享

太廟遣公拜已高行禮 遣官祭太歲月將之神 興五  
鳳樓工 草原任順天督學曹溶河南學道房之騏職  
降順天督學張鳴駿二級調外用降國子監察酒薛所  
蘊司業羅憲汶各二級調用以濫送貢監違例多收故  
也 漕運提督王文奎坐擅免荒田租賦及瀆請故明  
陵寢祀典革職下刑部議罪

辛亥

戶部言去年八固山圈地止圈一面內薄地甚多以致  
秋成無望况今年東來滿洲又無地耕種若以遠處府  
州縣屯衛故明勲戚等地撥給又恐孤貧者無力運送

應于近京府州縣內不論有主無主地土撥換去年薄  
地並給今年東來滿洲其被圈之民于滿洲未圈州縣  
內查屯衛等地撥補仍照迁移遠近豁免錢糧四百里  
者准免二年三百里者准免一年以後無復再動民地  
廣滿漢兩便疏入從其議于是圈順義懷柔密雲平谷  
四縣地六萬七百<sup>五</sup>晌以延慶州永寧縣新保安永寧  
衛延慶衛延慶左衛右衛懷來衛無主屯地撥補圈雄  
縣大城新城三具地四萬九千一百一十五兩以東鹿縣  
阜城二縣無主屯地地撥圈容地任丘二縣地三萬五  
千五十一晌以武邑縣無主屯地撥補圈補河間府地二

十萬一千五百三十九晌以博野安平肅寧饒陽四縣  
先圈薄地撥補圈昌平良鄉房山易州四州縣地五萬  
九千八百六十晌以定晉州州無極縣舊保安深州堡  
桃花堡進鷄堡雞鳴駟龍門所無主屯地撥補圈安肅  
滿城二縣地三萬五千九百晌以武強藁城二縣無主  
屯地撥補圈完縣清苑二縣地四萬五千一百晌以真  
定縣無主屯地撥補圈通州三河薊州遵化四州縣地  
十一萬二千二十八晌以玉田豐潤縣圈剩無主屯地  
及遷安無主屯地撥補圈霸州新城滹縣武清東安  
高陽慶都固安安州永清滄州十一州縣地十九萬二  
千五百一十九晌以南皮靜海樂陵慶雲交河蠡縣靈  
壽行唐深州深澤曲陽新樂祁州故城德州各州縣無  
主屯地撥補圈深州涿水定興保定文安五州縣地十  
萬一千四百九十晌以猷縣先圈薄地撥補圈寶坻香  
河灤州樂亭四州縣地十萬二千二百晌以武城昌黎  
寧各縣無主屯地撥補

壬子

遣梅勒章京東阿賴統領官兵更番駐防杭州 科爾  
沁國喇喀沁烏朱穆秦教漢翁牛忒蘇尼忒扎魯特郭  
爾羅斯嵩齊特阿霸核等部落厄斯黑爾等來朝貢俱

宴賚如例 增設陝西興安鎮總兵一員兵四千名陞  
付將任珍為都督僉事充鎮守興安總兵官 湖廣總  
兵官柯永盛奏報興國州等處岩寇悉平下兵部察敘  
初陳友諒遣孽分為柯陳二姓盤踞江西武寧湖廣興  
國而居興國者尤蕃衍點悍迄明之世為患將三百年  
有柯抱冲者與何騰蛟結連自立為王以其黨陳珩玉  
為帥倚山結砦焚劫郡縣攻陷興國州殺武昌同知張  
夢白勢甚猖獗鎮臣柯永盛同按臣吳贊元遣將征剿  
十日內凡八載皆敗之俘斬無算焚其巢穴生擒抱冲  
珩玉斬之餘黨悉平前後獲婦女四百餘口騾馬二百

百匹頭俱分給有功將士及陣亡官兵家

乙卯

以畢祿為吏部理事官 陞登萊巡撫楊聲遠為淮揚

總督以原委署寧夏巡撫黃尔性為陝西巡撫 以正

紅旂杭素為擺牙喇甲喇章京 歸化城土默特部落

甲喇章京陀博克諾尔布等貢駝馬宴賚如例

丁巳

順天府舉行鄉飲酒禮

戊午

遣戶部啟心郎布當等賚諭察問朝鮮國王李倬以其

朝使貢物多疎玩也 定攝政王福金儀仗大旂二杆  
吾仗二對立瓜二對卧瓜二對骨朵二對綉孔雀青扇  
一對綉花青扇一對綉孔雀紅扇一對方紅傘二柄繡  
瑞草紅傘二柄綉寶花紅傘二柄曲柄傘一柄庶福金  
儀仗與和碩福金同 定諸王福金公主格格儀仗服  
色及公宮民人等妻車服制度和碩親王和碩福金公  
主帽頂大簪金佛項圈嵌東珠各十顆大旗二杆吾仗  
一對立瓜一對卧瓜一對骨朵一對綉花青扇一對綉  
孔雀紅扇一對綉寶花紅傘二柄曲柄傘一柄轎車紅  
頂紅幔頂上四角鑲邊及垂簷俱用青和碩親王庶福

金多羅郡王多羅福金及和碩格格帽頂大簪金佛項  
圈各嵌東珠八顆大旗二杆吾仗一對立瓜一對骨朵  
一對綉孔雀紅扇二對綉寶花紅傘二柄轎車紅頂紅  
幔頂上四角鑲邊及垂簷俱用藍多羅郡王庶福金多  
羅格格多羅貝勒多羅福金帽頂大簪金佛項圈各嵌  
東珠七顆吾仗一對立瓜一對綉花青扇一對綉寶花  
紅傘一柄轎車青頂青幔頂上四角鑲邊及垂簷俱用  
紅多羅貝勒庶福金多羅貝勒女多羅格格及固山貝  
子福金帽頂大簪金佛項圈各嵌東珠六顆轎車青頂  
藍幔頂上四角鑲邊及垂簷俱用紅固山貝子庶福金

固山格格及鎮國公夫人帽頂大簪金佛頂圈嵌東珠  
五顆轎車藍頂藍幔紅垂簷鎮國公庶夫人輔國公夫  
人及鎮國公女格、帽頂大簪金佛頂圈各嵌東珠四  
顆轎車藍頂藍幔青鑲紅垂簷輔國公庶夫人及輔國  
公女格、帽頂大簪金佛頂圈各嵌東珠三顆轎車藍  
頂藍幔紅鑲青垂簷和碩福金公主以下耳墜項圈金  
佛大簪所用東珠重五分衣服鞍轡鞵坐不許綉鳳及  
用黃緞如福金公主等不乘轎車不列儀仗以行人不  
避路不騎告者及坐之如有喪之家則仍乘所定轎車  
但不用轎頂不列儀仗牛录章京以上官員坐褥照舊

五品官員以下及民人等用白坐毡公夫人轎車青頂  
青幔綠垂簷銀頂一品官員妻轎車頂幔垂簷俱用青  
色銀頂二品官員妻轎車青頂藍幔青垂簷三品官員  
妻轎車藍頂藍幔青垂簷四品官員妻轎車頂幔垂簷  
俱藍色五品官員以下及有頂帶官員妻轎車藍頂藍  
幔垂簷無俱錫頂民人妻轎車藍頂幔無垂簷黑油衣  
項如有違定制者罪之  
已未

設宣府巡捕都司一員 山東巡撫丁大盛奏報范滕  
東阿等縣上寇平下所司知之

庚申

歸併荆關通惠河中河清江廠杭闕蕪湖龍江蘆政等  
關差于戶部

辛酉

已刻風霾晝晦有聲起東北 陞江南布政使司左布  
政使朱國柱為都察院右付都御史巡撫登萊江東等  
處

壬戌

禮部言漢官亦應如滿官例照頂帶用坐褥從之 賞  
科爾沁國貢黃魚使臣多多和敦泰齒爾開等緞布有

差 遣理藩院付理事官羅多理賜故喇嘛宜喇吉克  
三庫齒克齒鞍轡馬匹器皿茶香等物

陝西巡按趙瑞奏報官兵擊敗延慶賊渠郭君鎮終南  
賊渠孫守法生擒椒溝賊渠姚科耿三桂斬獲無算並  
請敘慶陽守城功疏俱下兵部

招撫江南大學士洪承疇奏報總兵官不從善黃鼎等  
擊安慶賊渠趙正大敗之生擒數十人斬首五百餘級  
獲器械盔甲無算下兵部 初赤斤蒙古都督永柱哈  
密衛畏兀國都督帖木兒卜喇等于明季入貢值寇亂  
劫去貢物勒印寄居肅州至是詣撫臣張尚求為題請

改給並乞口糧願照旧効忠納貢尚以聞疏入部議  
癸亥

禮部訂封世子例查故明諸王世子俱分封外省此例  
難循今應選擇吉期先期祭告

太廟局日

上御太和殿諸王文武各官俱令齊集照先封諸王例一  
一宣讀金冊賜以冊印授封既封世子其爵秩視郡王  
賜以嵌珠頂帽朝帶朝衣議上得

旨其頂帶用珠視郡王俱增一顆所用金珠玉及所服朝  
衣蟒緞從庫內給發製金冊金印告竣之日即行冊封

其祭告

太廟及冊封日所行典禮再行具奏世子儀仗照親王例  
製造

甲子

以蘇尼忒部落杜稜郡王叟塞子楮魯木襲王爵

乙丑

喇嘛班第達等來貢馬宴賚如例 遣山西道監察御  
史廖攀龍巡按順天河南道試監察御史盛復選巡視  
下江江南道試監察御史潘朝選巡視上江廣西道試  
監察御史周世科巡按福建

丁卯

以四川平定遣官祭告

天地

太廟

社稷免行慶賀禮

給鎮守陝西興安等處提兵官閤防

上御中和殿賜杜稜郡王楮魯木宴

允禮部請命會試

取中三百名不必分南北中卷同考官用十八員

戊辰

陞內翰林弘文院侍讀陳具慶為內秘書院學士 賞

譯遼金元史蒙古侍讀杜雷塞稜他赤哈哈番索訥木

各馬三匹銀三十兩騰寫侍讀古岱他赤哈哈番畢禮

克嵩叟塞銀各四十兩 戶部吉巡視陝西茶馬應遣

烏真起哈官一員通蒙古語滿官一員諸習通事一員

筆帖式一員從之

己巳

賜杜稜郡王楮魯木銀百兩及甲盧玲瓏鞍轡緞布銀  
器等物其從官俱宴賚有差 以原任杏山都司僉事

孫承忠為山東掌印都司 鑄給分防歸德恭將閤防

庚午

罰輔政和碩鄭親王濟爾哈朗銀二千兩革刑部尚書

吳達海啟心郎額爾克圖世職付理事官胡敏鞭五十折贖以王殿台基踰制及擅用銅獅龜鶴吳達海等議罪徇情故也 授三等公拜尹嵩為鎮國公以征喀爾喀部落土謝嵩汗碩雷汗屢著戰功故也 授三等鎮國將軍錫翰為輔國公以宗室故加恩遇云 贈戰歿特木登為牛录章京以其子祭翰襲職蝦岱哀為牛录章京以其子伊未孫襲職 以故三等甲喇章京勾赫德已嵩魯弟鍾吉達牛录章京兼半个前程車尔格子法古達牛录章京克色巴嵩魯兄克習布雷致仕牛录章京阿邦伯子孟古貝俱襲職 山東巡撫丁文盛坐

縱盜及州縣失守削職下刑部究擬

辛未

萬壽節遣禮部尚書覺羅郎丘祭

太廟是日

上御殿受朝賀賜諸王貝勒貝子文武羣臣宴 命給直省文武官員勅書及精微批兼書滿漢字

二月壬申朔

癸酉

陞直隸霸州道副使張儒秀為都察院右僉都御史巡撫山東 陞內翰林國史院檢討胡統虞為國子監祭

酒內翰林弘文院檢討劉肇國為國子監司業吏科左  
給事中韓源為本科都給事中 遣福建道監察御史  
王昌胤提督順天學政

甲戌

賜習滿書庶吉士劉澤芳張文明章成賢王紫綾夏敷  
九沙澄胡兆龍李蔚艾元徵等貂帽涼帽各一頂皮鑲  
朝衣緞朝衣各一襲靴各一双

乙亥

署兩廣總督事佟養甲奏報官兵平梧州 命大學士  
范文程剛林祁克格馮銓審完我宋權為會試主考官

丙子

喀爾喀部落扎薩克噶汗遣邁達禮等貢方物宴賚如  
例

丁丑

遣大學士祁克格祭

先師孔子 戶工二部十九處闕差漢官外增設滿洲  
官十九員烏真超哈官十九員 陝西總督孟喬芳奏  
報賀珍等殘孽出沒漢中孫守法盤踞興安胡尚宸負  
固不服副將王平等剿賀珍劉二虎夥賊于興安斬尚  
宸于板橋南山困守法泰四子于椒溝下部察敘

戊寅

祭

大社

大稷遣禮部尚書覺羅郎丘行礼

壬午

遣山東道監察御史董成學巡按江西 賜大計卓異

官布政使劉和過等二十三員蟒緞朝衣各一襲 夜

月掩犯木星 廣西梧州提兵官徐國棟卒

癸未

上御太和殿賜回舅科尔沁國桑阿爾多及其從人宴

以浙東福建平定頒詔天下詔曰自平定中原以後浙東全關尚為唐藩所阻聲教未達稅畝增科越年橫歛爾百姓辛苦墊隘無所控訴朕甚憫焉爰命征南大將軍貝勒博洛振旅而前救茲黎庶仰賴

天地眷綏

祖宗垂佑既定浙東遂取閩越先聲所至窮寇潛遁大將掩追及于汀水朱聿釗就滅列郡悉平顧惟僭號阻兵其民何罪青災肆赦倍切朕懷方出之水火之中宜躋之平康之域詔茲大賚咸與維新所有地方合行恩例具列于後一自順治三年十月初三日昧爽以前浙東

福建新定地方官吏兵民人等犯罪無論輕重大小已發覺未發覺已結正未結止咸赦除之有以赦前事相告訟者以其罪之一浙江福建人丁地畝本折錢糧併衛所屯糧除浙江杭嘉湖三府業經該總督題准照平南恩詔開征今浙東八府併福建全省俱自順治四年正月初一日起通照前朝萬曆四十八年則例征收天啟崇禎加派盡行蠲免其唐魯二藩僭號竊據疊派橫征地方尤稱苦累一切悉行停止以蘇民困有司借名私派加耗虐民者事發治以重罪一新定地方徵收各項錢糧通自順治四年正月初一日起以前已征在

官者起解充餉拖欠在民者悉行蠲免一滿漢有功文武各官併行間兵士俱着該部通行察敘以憑陞賞一新定地方禮部速頒時憲歷使官民遵行正朔一浙閩等處文武各官果于大兵未到之前倡先慕義剃髮歸順者該撫按通行察奏官吏軍民人等前因兵燹流徙他鄉望因來歸者地方官加意招撫一該地方山林隱逸有文武才畧堪為時用者撫按據實奏荐一新定地方各儒學廩增附生員食廩肄業優免及每學息貢一名正貢一名俱照登極之恩詔則例各學貧生聽地方官核寔申文該提學官于所在學田內動支錢米酌量

賑給一該地方歷代帝王陵寢有司照例以時致祭及  
名臣賢士墳墓俱嚴禁奸民掘毀一新定地方兵民年  
七十以上者許一丁侍養免其雜派差役八十以上者  
加給絹一疋絲一斤米一石肉十斤九十以上者倍之  
有德行者聞為鄉里所敬服者給與頂帶榮身一浙江  
起解戶禮兵工四部金花果品菜豈荀黃白蠟富戶派  
刺米絲絹藍鈔草束協濟昌平黃蠟扣價顏料餘銀輕  
齋藥材牲口會試料價雕填漆匠班竹白猪鬃絕炒鐵  
課槐花梔子烏梅漁課麻鐵魚膠等料課鐵馬站并新  
改折監甲腰刀胖袄箭弦等項福建起解戶禮工三部

金花料價厨料菜口牲口軍辦藍鈔農桑夏稅絹價翎  
鰓并新舊政折胖袄軍器箭藍江南藍鈔狐皮麻鐵協  
濟昌平馬價等項各折色錢糧浙江漕白糧米絲絹黃  
蠟茶葉顏料黃麻粟果藥材金銀箔荐新芽茶弓折牛  
角筆管兔皮香鯉皮山羊毛粗細銅絲鐵線銅條鉄條  
鍍白銅綠青絲花碌子猫竹紫竹筆竹白硝鹿皮狐皮  
槐花梔子烏梅松香廣膠書籍紙桐木黃白榜紙歲造  
緞罩漆嚴漆桐油等項福建京庫顏料黃白蠟芽茶香  
料樟腦藥味緞匹課鐵連鐵螺殼翠毛白硝鹿皮虎皮  
班竹弓折牛角等項各本色錢糧以上併鋪墊水脚俱

前朝萬曆年間賦役全書徵收自順治四年正月初一日以前已徵在官者起解充餉拖欠在民者應行蠲免一浙江起解江南各衙門折色永福倉米折絹折絹歷日直部把門卓隸獄卒草折漕折山羊折桐油折餘絲易銀并本色漕糧白糧米絹匹合羅絲荒絲藥材金銀箔芽茶甘蔗等項俱照前朝萬曆年賦役全書徵收解赴戶部交納自順治四年正月初一日以前已征在官者起解充餉拖欠在民者悉行蠲免一浙閩運司鹽課前代天啟崇禎年間加派名色甚多深為商厲今盡行蠲免止照萬曆年間旧額按引徵課一關津抽稅原

屬訊察非欲困商明末疊增數倍原額已經戶部題定照萬曆年間原額及天啟崇禎遞增額數一半征收杭州南北二關先已差官其餘自順治四年正月初一日以後俱照此例一体抽徵其州縣零星抽取落地稅銀名色及閩省勢宦土豪不肖有司向來津頭牙店擅科私稅概行嚴禁違者重治一丁銀雖有定額但生齒凋耗之後年老殘疾盡苦追徵甚至包納逃亡貽累戶族殊堪憫惻自今以後各撫按官嚴行有司細加編審凡年老殘疾并逃亡故絕者悉與豁免一窮民鰥寡孤獨鳶廢殘疾不能自存者聽該府州縣申文撫按動支預

備倉糧給養一各地方勢豪人等受人投獻產業人口及騙詐財物者許自首免罪各還原主如被人告發不在赦例仍追還原主一民間貿易資本雖前赦前應還應取者照舊還取一浙閩自明季以來山場環區之地多被豪強私霸自肥密結有司隱匿錢課聽撫按清察歸官前罪免論一營路津島將領等官帶兵來歸及官吏軍民人等具表投降降者概赦前罪如果有功績仍行陞賞一歸順地方城市村堡兵馬經過不許騷擾一新順官兵原係各營者仍入經制有願歸農者聽行一將領等官有乘機擾攘私帶在官兵丁馬匹船隻回家

者如果全照原數交官前事免論一土寇有脅從兵擒賊首赴官連名自首者俱准赦罪一衛軍已故屯丁永不勾補森秋班軍一概蠲免永不赴班著役其濱海各衛前朝掛籍軍丁有逃竄諸島避匿海艖及散亡諸澳通番干禁者概從赦宥聽其歸里安業官吏人等謫戍到衛者悉放回原籍一東南海外琉球安南暹羅日本諸國附近浙閩有慕義投誠納款來朝者地方官即為奏達與朝鮮等國一體優待用著懷柔一越訴誣告敗俗傷財已經嚴禁該地方戶婚田土小事俱就有司歸結倘奸棍訟師誘陷愚民入京越訴定加等反坐一新

附地方以恤民為第一義有司濫准詞狀及縱役擾民者該撫按叅提究處巡按官委理刑察監州縣訪惡科索紙贖搜取贓罰害民尤甚及撫按等官交際餽遺實長貪贖併照平南詔例一體嚴禁有故違者事發重治於戲深殘去殺用弘濟夫艱難布澤流膏務與之為体思大業克成一統新恩誕布于遐方偕茲率土之民永底太平之治布告中外咸使聞知

甲申

厄魯得部落吳霸錫台吉等朝貢宴賚如例

乙酉

諭天下朝覲官員曰天下人民困苦極矣朕既出之水  
火而隨興監司子令共圖治平蓋四載于茲柰明季之  
積弊難除頽風猶煽有司則貪婪成癖小民之疾痛難  
辭司道則賄賂熏心屬吏之貞邪莫辨瘡痍未起朕削  
彌工流離顛連未見何方招撫荏苒符哺聚不聞何道消  
弭朝廷之德意時勤郡邑之廢格如故優游日月黃觀  
陞遷雖婪墨間有糾彈而奸猾每 賄脫朕甚憤之茲  
當大計已嚴飭所司貪酷重懲闡章罔貫爾等始准留  
任仍服舊官尚思被濯前愆勉圖後效滌穢濁以清廉  
易煩苛為寬大予以助流愷澤永保治安庶稱朕奉

天子民至意當不靳顯擢以旌爾勞如或藉法行私剝下  
媚上巧文欺謾庇罪保奸仍踵向來積習因憲凜存必  
不爾貸爾其欽哉

丙戌

初達賴喇嘛班禪庫圖克圖巴哈庫圖克圖魯克巴庫  
圖克圖伊爾禮爾薩布庫圖克圖薩恩夏喇嘛額爾濟  
東庫圖克圖伊恩達克隆庫圖克圖諾門汗各上書問  
安並獻方物至是遣喇嘛蝦格隆等存問各賜金玉器  
四緞疋雕鞍甲冑等物

丁亥

復山西額站銀十五萬八千六百九十三兩並禁私派  
從巡撫申朝紀請也

己丑

招撫江南大學士洪承疇奏報故明宗室 議貴自稱  
瑞昌王與湖賊趙正聚寇沅池我兵進勦獲議貴與正  
命斬之

庚寅

革安慶提兵黃鼎職以輕信賊首趙正詐降畧不為備  
以致失利故也

辛卯

陞河南衛輝府知府王來覲為本省按察司副使兼叅議分守河南道湖廣漢陽府知府王崇儒為本省按察司付使兼叅議分守岳州道江西廣信府知府張鳳儀為本省按察司副使分巡嶺北道江南揚州府知府劉奇為本省按察司付使鳳泗兵備道淮安府知府謝道為本省按察司付使清和兵備道蘇州府知府陳服遠為本省按察司副使常鎮兵備道山西太原府知府王昌齡為本省按察司付使分巡冀寧道山東東昌府知府李三元為本省按察司付使青州兵備道江西南昌府知府史應選為本省按察司付使屯田水利道山

西驛傳道叅政汪光緒為陝西按察司付使分巡關內道陝西提學道僉事楊璫為山西布政使司叅議分巡冀北道直隸涿州知州劉有道為山東按察司僉事霸州兵備道

壬辰

甲喇章京陳鵬起坐盜人牛馬革職

乙未

遣官祭

歷代帝王 命房山縣知縣祭金帝陵

征南大將多羅貝勒博洛疏報廣州府偽唐王朱聿釗

第聿鎮借方紹武署兩廣總督 佟養甲署提督李成棟帥師進勒斬聿鎮并偽周王肅眾孟玉思炎遠王術雅鄧王器瑀錐野王壽鋤通山王蘊鉞高密王弘椅仁化王慈納鄔陵王肅汭南安王企壠周王世子恭探連王世子儼鍊宗室由梧慈剽獲偽王及文武官員印記共三百九十顆廣州平定捷至命敘有功將士祭告詔赦事宜命所司擇吉以聞

丁酉

降吏科給事中林起龍二級調外用以徇情舉大理寺卿王永吉為山東巡撫故也 陞江南兵備道參議趙

福星為本省布政使司左布政使山東東兗道參政董宗理為本省布政使司左布政使直隸薊州道僉事孫茂蘭為山西布政使司左布政使江南徽寧道副使張文衡為本省按察司按察使陝西關南道副使董天機為山西按察司按察使 鄭陽撫治潘士良以不稱職解任 降江寧巡撫王國寶一級調外用以擒獲奸細王伯時不請旨擅殺故也

戊戌

以貢生孫枝秀為浙江按察司副使寧紹兵備道 以原任巡鹽御史佟國弼為都察院右僉都御史巡撫福

建 實授福建委署各官以內院中書朱鼎新為布政  
司使左布政使進士趙林翹為布政司使右布政使總  
兵楊御蕃為按察司按察使進士史起明為按察司僉  
事管分守福寧道參議事彭遇龍為按察司僉事管分  
守漳南道恭議事王三俊為按察司僉事巡海道張夬  
為按察司僉事分巡建南道閔肅為按察司僉事分巡  
興泉道閔度為按察司僉事提調學政貢生張有道為  
按察司僉事督糧道曾延孔為按察司僉事管分守建  
南道參議事董振秀為按察司僉事駟傳道陳日新為  
按察司僉事屯鹽水利道周之翰為按察司僉事分巡

漳南道潘映婁為按察司僉事分巡福寧道

大清世祖體天隆運英睿欽文大德弘功至仁純孝章皇

帝實錄卷之三十一

順治四年三月壬寅朔

清明節祭

太廟遣刑部尚書吳達海行礼 遣官祭

福陵

昭陵

癸卯

輔國公翁古卒諡懷愍

甲辰

